



**H**AION apud Phrysios honesto loco natus & optimè educatus est. Is cum in patria literarū fundamenta iecisset, sese ad Louaniensem Academiam contulit, atq; ibidem 1521 Erasmo Roterodamo ob præclaram indolē gratissimus fuit. Postea quoq; in Italiā profectus, Iurisprudentiæ operā dedit, & in ea facultate adeò profecit, ut omniū uotis legum Doctor creatus sit. Inde sub annum 1528 in patriam reuersus, Cæsarei senatus ad Leouardū consiliarius cōstitutus est. In eo loco eius uirtutes cum multifaria eruditioē adeò emicuēre, ut in magna apud omnes autoritate extiterit, atq; præclarum sibi nomen compararit. Vnde merito hoc loco huius Haionis, quem Erasmus perpetuò dilexit, & ob uarias animi & corporis uirtutes suis scriptis celebrauit, honesta mentio facta. Eras. in Epist.